

摘藻堂四庫全書薈要

集部

欽定四庫全書薈要

集部

禮部集卷一至三

臣董誥詳校

詳校官助教臣謝登雋



欽定四庫全書薈要

禮部集目錄

卷一

賦

卷二

古詩五言

卷三

古詩五言



卷四

古詩五言

卷五

古詩七言

卷六

律詩五言

卷七

律詩五言

長章 五言

卷八

律詩 七言

絕句 五言 六言

卷九

絕句 七言

卷十

雜著

附錄

卷十一

書

表

箴

銘

贊

頌

卷十二

記

卷十三

記

卷十四

序

卷十五

序

卷十六

題跋

卷十七

題跋

卷十八

題跋

卷十九

策問

卷二十

文移

祭文

事述

附錄

臣等謹案禮部集二十卷元吳師道撰師道字正傳婺州蘭谿人至治元年進士少與許謙從金履祥遊講明朱子之學故其學問文

章得有統緒仕至國子博士張樞撰墓表杜
本撰墓誌皆稱致仕後授奉議大夫禮部郎
中而宋濂所作墓碑則稱以禮部郎中致仕
元史本傳亦同蓋元史即濂所撰故與碑合
然樞與本皆師道舊友不應有悞疑濂記錄
未真也此集本名蘭陰山房類稿今題曰禮
部蓋後人以所進之官稱之師道著述甚富
尚有易禠說二卷書禠說六卷詩禠說二卷

春秋胡氏傳附正十二卷今多散佚惟戰國策校註十卷絳守居園池記校註一卷敬鄉錄二十三卷尚行於世俱別著錄此集詩九卷文十一卷乃王士禎從徐秉義抄傳之蓋亦僅存之本矣乾隆四十三年二月恭校上

總纂官

臣紀昀臣陸錫熊臣孫士毅

總校官

臣陸

費

墀

欽定四庫全書叢要卷一萬六千四百五十三

集部

禮部集卷一

元 吳師道 撰

賦

望嶧山賦

友人黃君晉卿向嘗為予言鄒縣之竟東望嶧
山峭然孤起孟子實生于是可想見其人焉予
過其地睇瞻興懷信斯言之有徵因賦以道之

其詞曰

濟重江而北征兮漫千里之平陸過邾婁之故墟兮極
東鄉以騁目羣山委蛇而奔湊兮青遙遙其相屬萃峻
峯之孤起兮儼雄踞而特尊絕浮雲而上出兮俯培塿
其無隣曰茲惟東魯之嶧山兮實岱宗之陪輔杳日觀
其猶未覲兮乃獨快茲先睹表積石之嶙峋兮却朽壤
而弗附勢絡繹而綿延兮宜著名于終古惜行邁之靡
靡兮盼遼邈而不可登披圖牒而考稽兮嘉詩書之所

稱神禹定其職貢兮繫孤桐之挺植魯侯荒于大東兮
遂保有以為域彼祖龍其何知兮窮萬里之轍迹升遐
巔而頌功兮斯獻諛而助賊咸陽既已飛灰兮野火宜
不赦夫頑石侈心忽其安在兮惟樹德之罔極吾獨羨
夫山川之精英兮微聖賢其孰當偉孟氏之特起兮在
戰國而堂堂氣浩然而剛大兮歷后土而蟠穹蒼雖擬
聖之有迹兮邈餘子其奚敢望屹茲山之猶故兮信並
立而俱長微予友之昔言兮羌有懷而不見悵欲語其

誰同兮徒激昂而增嘆

嶧山一名邾嶧山亦名鄒山

邾後改鄒故山從邑變

史記正義

引括地志云在兗州鄒縣南二十二里鄒山記云鄒山古之嶧山言絡繹相屬也今猶多桐樹然則詩鳧繹之繹書之嶧陽同此山也書蔡傳地志云東海郡下邳縣西有葛嶧山古文以為嶧山下邳今淮陽軍下邳縣此據鄭氏說按此則徐有兩嶧竊恐鄒嶧為是也

雲臥八極賦 并序

集賢都事李君漑之風神高邁夙有山林之趣
題其室曰雲臥八極取太白詩語也且命東陽
吳某賦之愚觀君方以才業用而其言將飄然
獨往者故為之具道其樂而復因末簡以致意
焉其詞曰

承玄元之遐胄兮復孕靈于長庚夏高安之絕塵兮中
湛然而潔清餐玉芝以為糧兮吸沆瀣于金莖襲孫蘭

之芳菲兮憂明璫之晶熒渺獨立乎物表兮隘濁壤之
營營羨山林之幽遐兮有白雲之英英攀謝公之遺躅
兮契希夷之高情澹怡悅而自足兮誰與共茲一壑撫
磐石以為牀兮翳長林以為幄被純素之幽光兮睨浮
游之冥漠羅孤彈之清琴兮送雙翔之黃鶴嘯飛泉而
漱松風兮渺天宇之寥廓歛飛神而輕舉兮凌倒景而
上浮建采虹以為旗兮挾迅電以為輶前飛廉而後豐
隆兮並羲和而奔流始發軔于暘谷兮拂予袂兮扶桑

導巽隅而行邁兮遂窮厯乎炎荒軼朱天之曠莽兮直參井
之所當跨崑崙而越流沙兮求曜靈之所藏不周呀其欲合
兮余超凌以徑度馳閭野之重陰兮命燭龍使先路循尾閭
而抵艮維兮復蕩蕩其無終予游曷其有尼兮聊弭節而從
容曠一息而萬里兮睇窮髮於咫尺俯齊州之九點兮曾不
啻夫蟻垤慨下土之擾擾兮紛萬蚋之起滅志彷徨而廣大
兮形逍遙而自得羌茲樂之可懷兮吾寧放而忘返聖乘則
而植中兮揆厥初而不遠散充溢於無垠兮斂不滿夫鎔銖

妙元化之於穆兮信機要之有樞擴方宇之內外兮顧何適
而非途時動靜而不愆兮與造物而為徒委余心而一致兮
又何必遯世而離居亂曰雲蟠林棲荒以寂兮埃壒溷濁不
可息兮至人之心不滯於迹兮惟時惟中自太一兮

懷別賦

留別楊志行待制父子

余悲古人之不見兮每撫卷而長嘆幸斯文之未湮兮
有作者其猶可觀行四方而厯求兮嗟遇合之良難驅
余車於宛陵兮忝卑冗之微官際碩師之戾止兮挾文

采之鵲鸞仰門牆之咫尺兮從几杖之盤桓鼓經筭之
芳塵兮挹詞海之餘瀾誠內充以自慰兮忘栖栖之鮮
歡既往造夫承明之廬兮邈遐睇乎雲端忽幡然其來
歸兮踐良期于歲寒方金匱之紬書兮競羣英之彈冠
邇清光以奏伎兮銜奇賈于琅玕何翁李之齊志兮追
嘯歌于考槃塞余抱此幽懷兮憎怫鬱乎肺肝望白雲
之悠悠兮昧飛雪之漫漫念不可以此留兮返余舍乎
叢蘭惜方密而遽睽兮尚勤勸夫加餐俗滔滔而日靡

兮慨修名之孰完時動靜公則然兮夫豈非小子之所
安雖千里其非遙兮炯相照于中丹

至治四御史詩成憲甫廉使徵賦

至治之元英主當御時崇梵教大啟宮宇都城嗟咨民
勞役巨蹇蹇執法四臣列疏臣直伊何由聖明故維時
權姦實激霆怒誅竄亟加誣以謗慙粵若古先誹木諫
鼓我元造邦責在憲府列聖虛心忠諤繼武偉茲弗褒
名節奚樹皇化更新直氣斯吐生榮歿賚寵以異數嗟

嗟在位有目斯睹恪恭爾職正直是與明明國是赫赫
王度母利而回母禍而懼明于一時千載彌著小儒作
詩用贊言路

山中人二章贈方壽甫并寄尊翁存雅

山中人兮幽棲渺仙華兮翠微水冥冥兮谷淒淒秋莽
蒼兮烟霏綠熊兮玄猿吟嘯兮林間楓刁刁兮欲落桂
青青兮生寒弔玉女兮寂寞莫瞻故宮兮巘岼紛雲旗兮
翠蕤儼欲降兮復還復還兮何許愁慘戚兮不得語送

滄溟兮白日盡思軒轅兮涕如雨昔粵客兮同遊今獨
居兮白頭欲往從兮路阻修倚秋風兮弗見仰雲空兮

悠悠

粵客謂
謝臯父

山中人兮相羊衣芳蓀兮蓉裳佩飛霞兮夏明璫挾兩
驂兮上驤飄絳節兮北荒蹇胡為兮石房空原無人兮
白雲茫茫山之英兮不來羌日暮兮徊徨歸來兮誰語
振雅音兮超前人以騁武揮五絃兮松風洗雙魚兮澗
中攀桂枝兮長相從我所思兮微茲人其誰與同

南寧軍載酒堂祠神樂章

宜春彭君震卿佐治儋耳訪求眉山先生遺跡
得故所鑿井渫之又新作載酒堂肖先生像買
田奉祀其表賢化俗之志誠非今世為吏者所
及諸公為文若詩紀之當矣第想夫考成招薦
之初當有樂神之章因補其遺昔韓子為柳柳
州羅池廟碑末係以歌而先生作韓碑效之間
採韓語輒取斯意即先生所以道韓者還事先

生馬先生其吐諸其詞曰

荔子丹兮蕉黃瀝桂酒兮芬香昔無席兮今堂聖欲居
夷兮賢蹈海時不容兮何害吾未離人兮豈與元氣而
齊天睨翻天兮雲濤負瓢以歌兮著屐以遨神彷彿兮
猶豪風詩書兮公之教民飲食兮知報井有源兮寧室
而淖公神在天兮猶地有泉公昔言之兮我今亦然相
此邦兮尚千萬年

揆初堂詞

揆初兮茲堂思予親兮不忘羅甘毳兮酒漿親不在兮
曷其敢嘗揆初兮茲日思予親兮罔極吹笙兮鼓瑟親
不在兮曷其自逸嗟予身之在茲豈予親之遠而揆予
初而惕然盍令歸以為期

鶴野詞

為蕭存道元帥作

鶴東飛兮遼海之涯海澄澄兮不驚波鶴西飛兮蜀山
之外山蒼蒼兮草木旆旆鶴飛來兮中州闕河廓兮烟
霧收望神京兮魏闕侶威鳳兮遨遊風高兮月白警清

喉兮中夕歟矯翼兮遐舉超滇池兮一息嗟昂昂兮爾
姿孰在野兮能羈摩層霄兮放八極渺曠迥兮難為期

白雲詞

贈龍虎山孫道士

白雲兮溶溶朝躋兮太空白雲兮冉冉暮歸來兮山之
崦斂不盈兮散彌八區變化歟忽兮嗟孰吸而孰噓粵
有人兮神明游乘元氣兮上浮洒清冷之甘澍騰蜿蜒
於靈湫鄉人兮歌舞繼自今兮羅熾陽其無苦琳宮兮
瑤宇澹逍遙兮容與欲往從之路修阻雲遙遙兮獨懷

人其延佇

禮部集卷一

欽定四庫全書薈要卷一萬六千四百五十四

具部

禮部集卷二

元 吳師道 撰

古詩五言

秋懷二首

江南木葉飛江北百草黃
風烟澹莽蒼悵望川途長
寒魚聚其羣鴻雁忽成行
俯仰念時物索居耿淒涼
昔我二三子敦好攻文章
漂零時相失尺素不得將
人生四

方志企爾揚聲光登山豈無車涉水亦有航真誠諒不
隔離別庸何傷

忽忽意不懌獨步登高丘羣山紛糾蟠前當大河流八
月草木凋萬里風雲愁寒晶蕩白日孤鴻去悠悠鴻飛
不可極其下禹九州古來英雄士百戰橫戈矛念我當
壯年弗獲茲地遊豈無干時畧欲往誰見收君看天馬
駒失足羞羗牛

和李坦之二首

白雲滿蒼梧黃葉墮瀟湘九疑青峰下水冷孤祠荒漠
漠帝子魂千載懷故鄉秋風吹落日猩猩嘯幽篁瑟聲
杳何處臨江思茫茫倚楫欲弔之南望涕霑裳

又

中原帶黃河太行臥嶺套寒空渺萬里日暮愁雲陰高
鳥飛不度孤兔餘哀音英雄百戰地意氣俱銷沈秋風
舊城闕野草荒烟深興亡不可極北望涕沾襟

李龍眠蓮社圖

遠公廬山下手種玉色蓮清修香火社雜還山林賢龍
眠弄筆墨貌出晉宋前橫橋虎溪水古木東林烟須眉
策遺老瓶磬趺枯禪石壇花雨落稽首西方仙休吟散
梵帙風鑪薦寒泉矯矯靖節翁歸心赴斜川分手溪上
笑攢眉社中緣淋浪漉酒巾籃輿搖醉眠止飲諒匪難
恥受異教牽空山舊行跡寂寞餘千年竟令妄庸兒攝
誘紛相傳陶翁我尚友掩卷心茫然

浩然觀分得浩字

過雨秋正佳出郭山漸好松門表靈宮石澗緣細道空
壇故葉積深殿陰色早丹遺井水香仙去庭柏老伊昔
崇玄元構詞始天寶靈風却縹塵金幢飛翠葆猶餘千
年像遂走羣吏禱我生無俗情道妙窮深討天根息綿
綿虛白生浩浩永懷潔身私非闕恨枯槁緬邈鸞鶴翔
空山動秋草

和黃晉卿效古五首

美人隔雲端可望不可隨天秋光景暮青鳥倏何之明

闕

不識察耿耿長相思合離諒有分素志誰能虧

又

士生一失勢忽作鴻毛輕悠悠百年間臨河俟其清黃
塵漲白日古道無人行衰榮迭代易故新更迭迎惟有
達識者振古流芳聲

又

升高望曠野游氣紛飛揚海岳潛消變金石何能長英
英冠蓋區覆手狐兔場富貴奚足道俛仰令人忘

又

天氣無停吹北鴻復南飛
鴻飛有時息游子去不極淹
留轉憔悴塵化衣色緇散
樗有高枝芳桂無完皮多才
祇自累不隱知何為

又

生抱世外姿與世鮮所歡
同心久契濶歲晏餘淒酸
安得子歸來製芰紉秋蘭
散髮弄明月行歌采琅玕
超然息萬慮冥合造化端

上巳日水西紀遊

今歲仍癸丑佳辰况清明天空朗遐矚及此新雨晴會
心得良彥飛蓋背層城始循長溪轉復傍清林行冲瑞
起亂響秀嶂巉孤橫邂逅見漁翁徘徊聽鶯鳴步入松
樹小坐逢僧語清洗鉢罷幽饌出門有餘情候暄覺風
快陰移知景傾前登古廟高俯睨春蕪平泛泛下白鳥
冥冥飛落英揮觴復臨流放歌聊濯纓境幽賞彌勝神
怡體自輕緬懷宇宙間茲日多合并五侯競豪靡晉人

悲死生豈若吾遊佳蕭然澹無營

夢先大父有感

死別一紀餘故迹隨流波哀端在腸臆慘若嬰沈疴昨
夢臨我前儼服冠我我手持一卷書授我仍長哦覺來
驚且悲庭樹酸風多惆悵送歸魂冉冉荒山阿永懷鍾
愛心生死耿不磨保躬蹈前訓歿世期無他奈何人事
乖志願常蹉跎平生素無淚此夕如傾河

題東吳謝氏春草池塘

江山富詞藻謝公劇清妍偶緣春風夢爭咏池草篇冥
搜諒亦苦神助誰云然情鍾同根愛妙契天機全西堂
渺風流東吳盛才賢烏衣鬱高門冠蓋何聯翩看花玉
缸飲聽雨書牀眠會心得妙唱馳譽誰後先飛亭歷野
木極目春無邊幽芳動纖綠湛影搖清漣時令塵中客
浩蕩寄所宣徘徊不能句返棹下蒼烟

清明哭

暄風吹陌塵野哭紛四起人哭尚可忍我哭那可止哀

哀兩年間奇禍不少俟哭母哀未終哭弟仍哭子生來
亦何娛展轉荊棘裏慰眼骨肉完豈恨同飲水春陽徧
羣動虐厲劇孤卉呼天自難噤尤怨寧昧理洒飯迫茲
辰淺壤魂猶寄淚極眼欲枯沈痛徹心髓

送人貢杭米之京

后皇制任土職貢來四方珍異匪余求服食乃其常金
華有嘉種玉粢令芬香土人昔肇端每歲賦其鄉頗聞
播種初行者避畎疆斂收畢徵納老稚不敢嘗擾擾府

中集數日何奔忙珠璣歷萬指錯落照九光圓好中式
度緘封謹縑囊矧今歲旱乾彌望茅葦荒野人懼不供
挈瓶越林岡及茲幸充數揚帆上天倉惟民秉恒性食
芹猶不忘勤動非所辭有司貴循良賢侯重承命護視
嚴周防行行不可遲去去凌風霜玉食倘見登仁恩沐
汪洋願推及物心共樂斯時康陳風以為贈別意何悠
長

和張同父感興五首

遠役嘉定居沈思惜流景秋風從何來脫葉下高嶺更
長夢屢斷月墮窗已回感時增隱憂撫躬發深省幽姿
豈解媚窘步何能騁迂疎性彌篤紛華念終冷聖門有
真樂妙理存至靜玉韞山自輝錦粲衣須絢

又

驅車游中原北渡臨大河縱觀岱宗雲却挹東溟波廓
此隘陋胸萬象何森羅祇恨苦匆匆急步無委蛇八極
浩無垠熙運當泰和遍游尚有期慨然發長歌

又

我家城南陬門徑深綠蕪每受俗子憎終歲誰闚闢張
公數相過不憚百里途高談振風雅攜袖光驪珠頗令
好懷開有若沈疴蘇謬陪冠蓋遊浪跡九軌衢回首江
南春晴烟暖粉榆同心各有適嗟我寧非圖

又

我生苦無才振步強追古寧堪侶簪組但可投農圃一
經業三世顧恐忝厥祖免俗正未能用時終何補誓言

終弗畔惇志希曾魯

又

嚴霜知蒼松盤根識利器
駕蹇混驂騶同驅不同至
頽波漫滔天投足幾無地
栖栖抱孱質岌岌抗獨志
萬鍾與千金何與平生事

金華觀分得琴字

春晏踐宿期雲間陟高岑
獲從勝友俱遂此物外心
月窟探萬仞龍淵測重陰
盤坐白石臺長嘯青櫟林
莫探

虛皇居急雨含蕭森松風飛淙合終夜淒笙琴何能發
孤咏千載同遺音

溪山仙館圖

平川漾輕舟蒼石擁高樹烟中連嶂斷林際飛甍露茲
宇誰所營列仙實來聚我生戀溪谷忽去踏塵路坐恐
孤夙期臨風悅延佇

合歡木

合歡愛嘉名矧復知昏旦淮土產特多蔥蘢蔭溝岸離

離青葉解冉冉紅茸散靜和宿露卷動與微風戀物意
豈悅人和樂自堪玩蹇予寡所諧觸事多恚悵亦擬學
嵇生植根向庭畔

追和黃晉卿北山紀遊八首

靈源

昔從招提遊春投上方宿池光蕩寒烟月樹深巖屋夜
久僧不歸無人話心曲

草堂

秀巘擁翠屏飛樓納遐景幽泉雲根出峽雪漱清冷誰
知一源微流潤被千頃

三洞

遙遙覆盆山千重萬重翠洞門春正閒丹光夜非秘如
何安期輩可聞不可遲

鹿田

山空鹿不來玉女孤憤古雲林暗白日空翠洒飛雨黃
精苗正肥滿地無人取

寶峯

草深山徑微宿雨含沮如憑雲陟層宮盤石翳幽樹未
遂丘壑棲悵然還獨去

潛岳

潘公舊游處清風滿林壑院古春苔生巖空夜泉落唯
餘一鉢在上塵漠漠

山橋

巉崖插澗立飛梁倚空上雲端挂遠白風林含餘響之

子有高懷獨恣山泉賞

寶石

春山花亂開野水被行路僧居不得到歷歷知佳處有
時夜深夢踏雨穿雲霧

休日雨

下曹客將迎休日仍不休今晨雨勢急暫爾散羣駒解
衣東軒下臥聽浪浪流豈不厭煩溽所欣稍優游素琴
試一彈書卷開復收蕭然澹飲水兒女更啞嘔始知一

日閒未易千金酬我非適時才分當卧林丘失足墮塵
網憔悴祇取羞逢人數言歸人復笑我留我留意誰會
作詩聊寫憂

九日登響山奉呈同遊者

響山臨響潭曾識太白來我欲遊其間却愧非仙才况
乃縛微官終年走塵埃幸茲九日至獲與羣彥陪高秋
慘雲物薄日翳復開駐馬青松陰披襟上崔嵬前晚孤
城低下瞰清溪迴諸峰送遠色攬結何雄哉野菊半含

英濁醪初發醅且盡一笑歡良會不易諧溪山宛如昨
斯人化飛灰想見登臨時逸氣橫九垓寧知千載後我
輩茲徘徊呼之尚可作相共揮予盃淒其暮色合颯颯
疾雨催扶攜下登舟水竹沿灣隈仰看千仞壁浩歌有
餘哀

廬山紀遊贈黃伯庸

昔聞匡廬名今睹雄秀姿我舟薄其趾陰雨深蔽之平
生潔清念諒受廬君知寧辭三日淹未恨一見遲邂逅

得佳士欣然即追隨晴雲散諸峯攢青逗參差五老太
古色相對心融怡披襟尋鹿迹挾洞徵賢祠風雲杳餘
韻書臺抗層基前瞻辨五乳仰顧指後倪却招白鶴仙
下瞰神龍陂飛橋度三峽艤棹凌深危噴濤雷雪眩轉
石雷霆馳薄暮不可留浙浙山風悲明發開先遊寒溪
涉清漪入門雙劍色夾道萬虬枝飛虹瀉青嶂漱玉下
深池竹亭夏幽闌四壁多殘碑出林送落日踏月仍遶
嬉移舟星子灣回首烟霧時歸來記所遊一一天下奇

茲山信綿邈覽勝猶多遺簡書屬有程逼仄嗟絆羈悠
悠此時路依依後來期巢棲雲松間瓢飲澗水湄昔賢
有高躅安用微官為

望九華山

輕舟下池口遙望青陽郭雲間見九華爭先出鋒鏑參
差敵背缺峭銳圭首削竹箭拔春芽芙蓉攢秋萼奇姿
信明麗遠勢仍聯絡下有巖谷幽真靈諒茲宅詭哉末
世士強以名號託丹崖不受滓青峰鎮如昨千載知屬

誰含情寄溟漠

宋齊丘號九華先生

魯港

支港分江流長烟接淮岸青山暮隱隱白波寒漫漫津
鼓迎過船客子暫休館蕭瑟簷葦叢酒家亦相喚按行
值遺老話舊仍永嘆當時一聲鉦散卒十三萬嗟哉彼
孱庸勤闕比姬旦

十二月二十二日宿七里寺書壁

微官不適意一身抱長憂况此凶歉年餓者擁道周及

物豈無念越職非所尤博濟古云難勸分動成仇荒村
走風雪破寺寒飈颭中夜耿不眠胡為此淹留

四月二十六日即事

竹光含積雨滿室青沈沈階除無行跡時有幽蟲吟澹
然終日間飲水弄書琴感慨復長歎誰共語此心遠聲
起天末門外江波深聳身上高閣晴雲出孤岑南風一
何佳遙遙披我衿

薔薇花詩為監州貫子素作

紅刺綴脩條清陰幕高架植根向來誰依此絃歌舍使
君有雅懷在泮樂休暇挹翠開新軒爛錦迎初夏香隨
夜露發色許晨霞借孤葩殿奇絕衆目共驚詫柔枝貫
當中纖葉紛垂下生生無窮意心本滋萬化至理諒斯
存悟領復闕訝今年歌鹿鳴闕將勤為駕明倫崇振厲
淑士勤慰藉英華豈無徵熒熒動光價寧殊當窗草未
遜同穎稼歌吟侈篇什宴賞飛盞竿更託丹青傳千春
不凋謝

百尺山圖為輝東陽賦

歲歲大雄峯故是洪都望若人真有力獨坐不復讓穹
崇構臺殿金碧開巖嶂天華百谷滿鍾唄層雲上緬懷
李唐主詩語留奇壯至今昭回光草木變姿狀上人東
陽秀法筵擁龍象縮地入秋毫銜袖有百丈山川稟瑰
異宅據神滋王矧復此道崇奔走有信向弱質阻攀緣
披圖一惆悵

禮部集卷二

欽定四庫全書薈要卷一萬六千四百五十五

集部

禮部集卷三

元 吳師道 撰

古詩

追和杜牧之弄水亭詩韻題清溪圖

池陽瀕大江羣山勢騫舞高甍出麗譙萬屋駢民五決
潏清溪流光照城南戶飛梁壓水天荒亭仆風雨載酒
客誰來弄水人已去蒼烟帶林薄綠野分畦圃賈槁攢

比擲魚舍低殘堵秋色激生漪夕陽閒映渚蕭蕭蒲柳
脫穢穢葭蘆語游鱗數儵尾沈影窺雁羽征毛寒未減
珠光時自吐隨流長堤盡當道奔石怒十里清瑤堆豁
訝爭刻露僧居草棘翳仙洞霞霏貯却還望翠微絕憐
浸秋浦太白與樊川千載不可遇搖筆想吟詩攜壺記
游處何當占民藉便欲棲村塢磯釣具竿綸畝耕供白
杵暫游竟返棹微官謾紆組中情託謠詠萬象恣嘲侮
九華興未已剡水期空負忽見張公圖如得千金賂沈

微正爭席榮誇無負弩悠悠山水思冉冉年歲暮展卷
倘頻來猶堪浣塵土

天厯己巳予過池陽與友人自清溪遊齊山賦詩紀
其事而溪上之勝未之及今觀靈源草堂所藏張公
訓清溪圖及諸巨公名章妙翰為之憮然自失因和
杜紫薇詩韻一首追述所懷非敢僭附前人第以晚
未獲見是圖用志喜幸云爾

遊東峯分得松字

層巔陟宮堯前轉憩東峰周遊撫荒址分坐蔭茂松天
際遠瀨白烟中寒樹重遐瞻目已極幽尋興未慵詠歸
樂童冠願言躡高踪

陳生山水圖

白雲從何來縈紆截青嶂落落倚岩松云云赴溪浪平
林出茅屋脩梁亦相向如何寂無人此境付空曠憶我
秋雨餘江南入遙望

德興開化道中三首

春晨氣澄穆雜卉香滿路百舌鳴高林墟烟淡如霧農
夫啟門出在野各有務行人獨何為懂懂自來去

又

宿雲逗疎雨睽睽吐晨旭晴光動千花霞雪眩川谷白
鵬戲深叢黃鳥鳴灌木俛仰竟忘疲歷此溪百曲

又

兩崖蒼石間湍水激清瀉山桃爛紅芳光影連上下春
風忽怒起意乃媚行者飛花撲人來攬之欲盈把

過常山趙忠簡公墓

客行常山道溪駛波沄沄
沂流睇崇岡問是丞相墳舍
舟步榛翳隧道不復分石麟已零落宰樹何披紛其傍
曾玄居混迹隨耕耘亦有顯仕者遠去忘榆枌長吏類
俗流但識期會勤葺治禁樵採此事今無聞堂堂中興
烈忠正而德文禍胎偃月奸冤魄炎海氛淒涼櫟車還
倉卒書疏焚誰知尉職卑乃能杜使君蒼天佑賢俊微
爾幾空羣興懷慨前事空山黯愁雲咸陽骨安在唾罵

奚足云騎箕儼天上千載彌清芬

信饒道中雪

五載樂閒曠閉關每安眠祖行復言邁迫此將殘年江
湖多北風臨流竟回船連旬踏凍雪驅馬不得前錦溪
何淪漪芝山亦清妍豈乏故人居欲往無由緣漫漫四
野白青是誰家烟僕夫慰飢面呼酒還忻然我獨不解
飲自苦誰汝憐前途幸云邁努力勤揮鞭職思在憂民
才薄志自堅只應高人笑胡不甘田園

入建德界

纔登東陽橋復涉蘭溪渡千里名地同依依鄉井故六合豈不寬遐瞻恣馳驚嗟此窮山中寧知擬予步三生有夙習茲遊亦奇遇獨憐迂狃姿諧俗匪心素覲顏民社寄抑志簿書務煩爾父老迎停車勞前路

巖巖齋詩為蕭從周經歷賦

泰山峙東方特起無附託瞻彼巖巖姿作鎮長四岳紛紛培塿卑瑣瑣丘垤薄巨靈鍾奇秀后土標磊落古來

鄒孟氏氣象儼相若尊王辨何雄闢異道斯廓剛大塞
兩間作配真不怯去之二千載士氣日以弱陵夷破崖
岸漫漶滅垠塿自非拔俗彥所立焉能卓西江名世家
清風在臺閣當復獬廌冠且贊芙蓉幙正色肅羣邪忠
言挺一諤巍然衆倚重行究經濟畧矯世起旱汙名齋
豈徒作屹流須砥柱伐病宜峻藥平治舍我誰勿謂高
難學

二月下旬寒食在郊書事言懷二十韻

生非適時才向用更從官所至輒歎飢命薄自招患去
年行視旱四境幾及半逆知憂未歇奔走今敢憚既廩
無餘糧私室乏朽貫民窮固堪憐俗戾那可勸餓者擁
我前對之謾興嘆蕭條空山裏荏苒芳序宴寺幽宿稍
便嶺峻步宜慢看花妨病眼揮策憐弱腕止飲已兩年
啖藥日無美獨飽豈所安輟殮空據案松楸入我夢忍
淚憶洒闕子規非惡聲夜半勤相喚是時久不雨望望
復憂旱風雷忽震蕩簷溜鳴達旦起看麥青青儵然一

疎散天心自仁愛忍使民命斷書生誓及物此志誠汗
漫投効方自茲偪仄嗟誰伴

和臨川危太樸見寄

美人江之西道路阻且長欲往從之遊未遇孤鳳翔娟
娟隔秋水蘭佩芙蓉裳瓊桂手自折贈客來池陽寄言
亦念我燿粲金玉章書生拙為吏窮山抱荒涼徒勞復
貧病不去策非良秋風起予思木落百草黃

目疾謝柳道傳張子長惠藥

處世五十年寡嗜仍少病天與兩目光炯炯素清淨前
年翳生左赤脈歟交橫審因察其源五色非所競學書
信夙習耽讀亦本性雖于二事切未必致茲症從來不
解飲杯勺強酬應積毒根胃腸標表發昏瞢鍼刺爭雜
施流血和淚迸丹砂與空青數市窘貧罄梔槩動盈筐
日啖不論命重氛幸全掃餘青時一盛荏苒三載間視
眈猶未瑩偏盲亦何害忌者遂相慶維茲二三友為我
憂恹恹許君屢貽書力勸宜習靜損讀復省思默坐但

微瞑心腎上下居火實以水勝炎炎降不怒行之久自
定殷勤柳與張有便嘗致訊為言醫法難俗師慎毋聽
一朝得奇藥千里轉持贈緘封謹視護述語頗詳盡開
罌異香發著筋金膏凝試之累旬日奇効他莫並感之
欲次骨報爾無照乘我生未見道絕塵悅猶瞠眊焉慙
訓言亦豈中未正扶持謝諸公磨刮完兩鏡漸驚容衰
老謬忝小邑令鄉山杳在望歸船行可榜把卷欣復適
看雲遠相映揮絃送孤鴻飄然動高興從今沒暮齒不

復憂倏倏永懷何能忘臨風寄孤咏

贈鐫者劉生

昨邑荒山中文陋嗟俗敝蠻序燬蕩餘大半莽榛翳官
居有曠圃豪奪恣氓隸清白泉久堙梅公亭已廢永懷
前賢迹敢忘崇化意亭池復舊觀講肄闢新位故人思
我文題篆仍表識碑榜餘清芬發揮藉精藝之子番國
來奇遇良有契通悟捷天機委折知筆勢我無及人德
誰墮峴山淚庶幾謨刻工尚可傳好事歸歟無長物摹

搗遂盈筇塵土厭徒勞山林深夙嗜舊編未卒業良友
纔一二幽棲金華北謠誦以卒歲削磨千仞崖遲子當
一至

九日約遊齊山不果晚登尊經閣

嘗愛杜牧之齊山作重九插菊滿頭歸清詩播人口我
來慨風流已落千載後深秋偶留滯佳節不可負詰朝
共攜壺夙戒二三友俄聞車馬集賓從分左右紅袖拂
烟靡翠幄張林藪欲往那敢前踟躕謾搔首晚風送淒

雨坐想驚散走參前巖高閣直上敞虛牖冥迷瞰城廓
披靡見蒲柳清溪來足下翠微真培塿古今杳同夢何
物能獨久斯人雖跌蕩而亦世希有飛蚊一飽聚瑣瑣
諒非偶真樂名教存聖謨揭星斗卓哉尊聞意夫豈為
杯酒登高茲誠最吾賦當不朽

四月癸卯原文杜徵君自武夷山道蘭江道傳子
長來會明日往拜許君益之墓道傳有詩因次其
韻

五年絕朋儔索居大江潯來歸頓聞同掃迹方投簪何
言得良會星聚臨蘭陰太常嚴耆德隱君澹冲衿追琢
金玉章諷和鸞鳳吟柴門閉潯雨竹樹幽深深笑言勞
契濶喜我病不斟張子飛車來頓忘山水淫欣然鍾期
遇寶匣開瑤琴獨嗟白雲老不見傷我心東芻拜墓下
衿佩來森森斯文黯銷落白日氛翳侵經德固不回豈
弟神所歆我我武夷峰鬱鬱金華岑前修未云邈千載
嗣遺音

靜樂齋詩為貫子素提舉賦

天機與嗜欲深淺互相勝
山夫躁擾胸戚戚恒若病
卓哉賢哲人與物澹無競
愧忤俯仰忘廣胖
心體應融融始內充

闕

形外盛坐見萬物春
本自中局瑩淵乎陋

巷居點也風雱詠千載
真踐難誰與踵希聖
君侯勲武裔文采世聯映
冰玉自孤標金朱非夙性
姱修厲素節俯與寒士並
至樂靜乃存無欲斯能靜
迄收至靜功知止貴先定
揭名示毋忘朝夕寧弗敬

過高郵訪母公叟提舉邵文卿檢校

昔我來高沙初踐入仕途回頭謝書冊便受朱墨拘河
堤事方急卷掃驅千夫呼聲相舉力赤目黔肌膚是秋
復淫潦四境無道租按行負病出蕩兀扁舟孤朝餐逐
雁驚暮宿翳菰蒲嚴冬寒到骨冰雪膠重河歲窮甫歸
休酷罰不少須獨哭返殊方抱恨絕復蘇爾來二十年
徇祿仍區區焉知復此來乘傳上京都雖辭下曹苦詎
稱諸生模入城人不識歷歷記市衢故人喜我至倒屣

迎門趨坐定察顏面憐我老更臞升沈各一笑存歿付
長吁邀我且小留相與為歡娛同行不可緩亦復稍踟
躕聯鑣踏斜日持觴送城隅後期約南還願言繫其駒
我無甘棠愛負丞愧吾徒感此良自慰意氣激儒愚炯
炯千里心持照覽社珠

送徐檢校之浙省并簡前政王正善

皇朝樹藩垣江剡天下最豈惟財賦強政體亦宏太羣
僚極高選吉士多藹藹贊參每從容勾檢尤倚賴徐卿

世名家踐歷振風裁運籌佐漕輓遺聲滿吳會今茲綴
班行深意良有在更張化絃新洗目盛除拜眷懷東南
區明見萬里外元宰迴北轅負墨亦狼狽終然公論白
少覺衆心快誰當進良謨清靜撫彫瘵諸公正虛左願
言急行邁王公山陰裔前政民所愛一時欣接武二妙
實同載我生一何幸識君向燕代與王邇鄉井而不共
傾蓋相知十五年未面已如對因之道懷思望望久相
待後日都城南春朝及王會

金匱山房集卷三
賦苕溪漁歌送殷尉之烏程

苕溪多漁村渺渺連震澤歸舟聞扣舷清唱烟水隔聲
隨晚風響長入秋山碧官曹閒無事聽之聊自適翛然
滄浪思恨不同泛宅如逢玄真子應問金華客

題虛靜齋

靈局本純一衆物交其中物去一自存靜虛乃問通風
收水上翳迹掃鑑影空茲境未易窺勗爾聖學功多言
徒紛紛請質無極翁

贈淵默子

聖人與天徒淵默以為宗龍化見矯矯雷聲隱隆隆蒙
莊玩一世獨贊柱下翁之人慕嘉名自視將無同誰云
比德難企可齊華嵩太音本希聲多言貴守中往祇爾
師訓勿憚立下風

蕭存道元帥去冬行後題

昔在天厯初狂寇俄震驚將軍疾驅馬肅肅出神京銜
命既撫綏仗鉞亦專征一巡晉冀靜再顧關洛清歸來

不言功高臥堯都城載懷戰鬪苦况乃饑饉并流離泣
道路白骨何縱橫慷慨發長謠緘題遺公卿至今讀其辭
惻惻傷我情風塵隨汎埽寰海正升平密勿藉良謨但
願休甲兵

常德玄妙觀陳道士落成三清昊天殿

迢迢武陵源仙蹤隔回舟風吹洞中花時逐江水流祠
宮闢靈場棟宇齊雲浮高居曠遐矚垂光下瓊樓九歌
發遺音夜半鏘鳴璆降康屢豐年延祚祈千秋於穆一

氣元寂寞與誰儔闕有造功化弘以周赫赫旦明
間及爾王與遊齋居謹對越信矣非形求

留昌平四詩

居庸關

神京望西北連山鬱崔嵬百里達關下兩崖忽中開林
霏遞掩映磴道隨縈迴豈知古燕塞徑以越與台夙聞
彈琴峽澗響逾清哀行行未及遠秋風漲黃埃翠華屈
榆林丞相前驅來疾還憚迫險顧瞻復徘徊惟天設限

蔽萬古何雄哉撫迹思往代鍵鑰每自摧皇衢坦蕩蕩
來往無驚猜毡車正聯絡怒轍奔春雷前趨見行殿遙
峙積雪堆騰凌萬馬騎暮繞龍虎臺愚生一何幸獲忝
儒臣陪憑高未成賦瑣瑣嗟微才

虎峪淙淙泉

居庸古塞口諸峯並嵯峨左轉萬栗林黃葉墮殘柯路
出草棘間石溝洙微波黃塵歛騰起知有飲馬駝前趨
俯絕壑素礫沒坡陀窮秋水沒竭泓渟不盈科無復聲

淙淙虛名誤來過下馬小徘徊土屋依岩阿野老向我
言深入水木多前年邑中人來此乘干戈委蛇數十里
隘險無誰何桃源志樂土商山有遺歌誰知戰爭場咫尺
隔網羅欲遊苦匆匆斜陽下前坡

劉諫議洞

李唐祚中微刑臣執其柄賢良裒然來一策駭羣聽事
機戒不密昌言毋乃病吾職非近臣陳義固當正為時
吐忠憤誓不顧軀命同遊雖厚顏得失非所競滔滔徇

曲學胡不愧元聖

闕

闕祠宇名教係邦政居庸峭摩

天過者竦深敬

朱懷珪碑

昌平官道傍臥碑何壯偉有唐營府督懷珪姓朱氏盧
龍昔強藩巨孽所根抵爾肩泚與滔逆氣粵有始耽耽
元相國肆筆方述紀寧知兩月後口襪不貸爾千載託
斯人遺臭同一軌荒墳莽無迹石獸相撐倚雙螭已插
地文字未殘毀徒令行路者喑喑嗟僭侈聖賢樹功德

金石無溢美末世乃濟奸事定有公是奈何極亨崇來
者紛未已留此懲不忠并以愧謫子

題趙子昂為吳德良所作蘭竹圖

幽蘭何猗猗疎莖亦蕭蕭石間澹相倚會合不待招吾
宗昔妙年依光近乘輶清分散春直風氣凌烟霄美人
松雪居逸思共飄飄欣然染毫素寫之配高標寶藏三
十載不啻英瓊瑤相攜湖江上未覺山林遙勗哉君子
心自保同不凋

清明山房詩

中局抱靈景湛湛一物無云何衆形役坐受昏垢汙君
子中夜存平旦氣則殊神光燭無恨還我摩尼珠

標山亭詩為張惟遠秘書作

齊東有佳山嶄然植雙標下窺城中人孰敢當其招濱
公擅奇賞領容窮岩堯憑高吐浩氣迥與長風飄至今
履屐跡仰之在層霄公子亦翩翩築構規山椒刈茅覆
白雪鑿石堆青瑤樹以檜柏株坐待陰蕭蕭曠言繼先

志于焉遠塵囂鵲峯華不注夙昔山泉饒云何茲地勝
談者猶寂寥圖經自茲補藉爾梓與喬我亦岩棲人平
生志耕樵欣然慕高躅東望浮雲遙揮絃送飛鴻因之
發長謠

關中張氏義行詩

我昔仕州縣天厯遭歲荒勸分走郊野日夜憂彷徨豪
民方樂禍射利閉圉倉非無補官闕誰發升斗藏稍稍
繩以法羣怒幾中傷有客為我言好義關中張素非高

貧家肯施貧人糧
陰德被鄉閭
斯士宜表章
因之感前
事使我增慨慷

送曹道士

溪光爛雲錦
宮居晃瓊瑤
中有學仙子
風度何飄飄
松牀臥散髮
光洞行吹簫
春序倏已闌
憶此山中招

送錢師復下第歸杭分得屈字

錢子南州彥
入貢隨方物
振羽臨春風
翻然出羅爵
朝臣謾知己
良友惟稱屈
清才豈終滯
篇製宜黼黻
京都

覽壯麗客思忘堙鬱衣上有緇塵歸向西湖祓

送王正善提舉廣東舶司

炎州際滄溟萬舶集奇貨有司慎委寄資用邦國佐王
君開敏姿踐歷聲華播漕輕有贏糧鹽莢無乏課曾陪
青瑣游合向烏府坐經年都城客車馬日相過無人為
吹噓去看飛鳶墮珠犀侈錯落囊楮甘點污願言挹清
風庶以肅頑懦廷中新命下海上羣商賀千載酌泉詩
遲君一來和

分韻賦石鼓送達兼善出守紹興

石刻三代遺獨數岐陽蒐剝落臥榛菅奇寶誰見收金
源誰好事馳載來薊丘豈知橋門鎮天為興邦留我老
幸摩挲考古思西周使君精篆法聲華振皇州足追史
籀製惜值車攻休駢駢五馬來東向會稽游會稽豈無
碑頌述徒誇浮願言宣仁化嗣續垂千秋

正旦臥病寫懷

老懶厭囂雜忍復逢元正高臥豈不佳抱病難為情沈

思往昔夢歷歷還自驚兒嬉不知愁燒竹到天明援筆
寫兆符意氣何縱橫中年世故迫黽勉事將迎斂板趨
大府慣踏曉鼓聲山縣稍雍容簪花映寒晴晚陪大明
班蹈舞隨公卿韻音聆法曲仙仗穿霓旌恍惚天上遊
持用誇平生覆手得憔悴憂患何交并逢時感易集閱
世念轉經六十行已哀百計茫無成雖畢尚平娶慚無
鄭子耕春陽被羣動我體當和平窺園怱蔥蒨曳履聽
嚶鳴竹素有深緣所競非浮榮寡過希前脩飲水復奚

營

寄題上清薛玄卿瓊林臺

上清羅宮居金碧耀日開天道西顛勝寄闕自成臺空

霏四山合湛碧兩溪迴琅玕雜玕瑱一一古仙栽微彼
人如玉何能儼相陪夙昔賦遠遊並海觀蓬萊徑辭竹
宮侍空谷自徘徊朝登雲霞發夜坐星月來高躅凌秋
昊逸氣橫九垓渺焉不可攀延佇起予懷

伏生授經圖


老生抱百篇藏壁避暴秦漢興流亡定取視半不存二
十有八篇當時號今文苟非著簡冊文字何由分無端
安國宏倡說異前聞並言本經失口授熟以馴承風競
接響誰復究其源宏也尤厚誣因圖畧開陳生老不能
行故遣錯至門云何易其語謂不能正言諸生近齊魯
傳言豈無人奈何使女子此事決非真錯來止授冊豈
復書所云藉令書所云審視生必親唐儒更妄謬謂目
亦眊昏痛哉百歲老幽壤抱冤沈

闕

初二子意祇務孔

壁尊以彼口傳訛非與吾書倫焉知反自累異說滋其
根詆誹忍廢古悍戾恣紛紜此輩不自量按據為奇新
但知快攻擊何曾精討論試看錯脫簡令古文所均口
熟豈應爾完具未必焚此理最易察翫習嘗因循考古
貴求是執要元不煩請誦馬班書毋為浪湫喧

禮部集卷三



總校官庶吉士臣侍朝

校對官檢討臣王鍾健

謄錄監生臣趙之璧

欽定四庫全書薈要

集部

禮部集卷六

四至

詳校官助教臣謝登雋



欽定四庫全書薈要卷一萬六千四百五十六

集部

禮部集卷四

元 吳師道 撰

詩七言

十臺懷古 并序

友人自杭來示及濟南王闕十臺懷古詩讀之

感慨不已夫江山故宮歌舞遺跡千載之上英

雄遊焉千載之下狐兔行焉俛仰廢興孰能無

情而詩人尤甚發為咏歌詞雖不同而意脗合
若物之鳴以類而應余安得忘言哉余生好遊
嘗聞司馬子長杜拾遺覽觀四方山川之勝以
壯其文心切慕之異時浮江淮沔沅湘上巴峽
過秦漢故都歷燕趙齊魯之陽所見如十臺尚
多訪遺老詢故實足以發一時之興快宿昔之
願歸而讀馬杜之詩文以證其所得焉耳

百花洲上姑蘇臺吳王宴時花正開半空畫燭西子醉

三更鐵甲東門來吳波渺渺吳山簇不見嬌顰倚闌曲
丹楓落月怨啼鳥碧草春風驚走鹿闔閭丘墓相連處
應恨夫差迷不悟斷指千年血未乾游魂夜哭臺前路

右姑蘇

靈王傾國崇臺宇按劍章華睨中土弁裳伏地走諸侯
鐘鼓凌空震三楚騁驕不畏伍子謀落成乞與吳兵游
孤舟竟走江上路塊土獨枕山中愁十年霸氣終蕭瑟
回首華容歸不得飢魂飄泊啼秋烟細腰却舞新王前

右章華

神娥縹渺高唐上
楚宮樓閣森相向
丹桂蒼楓湧孤闕
錦石清江簇連嶂
行雲漠漠飛雨寒
孤猿咽咽千花間
翠旗龍駕杳何處
斷魂殘夢愁空山
微臣宋玉誇能賦
當日襄王豈真過
千古秋風恨未平
高泉飛落三巴怒

右朝陽

昭王銳志移青社
築土懸金奉賢者
四方劍佩集強燕
千里風塵空駿馬
郭君自舉先羣豪
樂生獨步超凡曹

酬恩一雪霸國恥建功並倚雲天高君臣意氣千年少
落日荒墟沒秋草黃金買貴滿長安惆悵英雄布衣老
右黃金

項王戰馬從東來意氣蹴踏全秦摧入關不並沛公轡
還鄉却上彭城臺重瞳按劍風雲靡萬足騰空烟霧起
淒涼垓下泣名騅零落江濱餘數騎宋武千載心爭雄
登高把酒臨秋風詐移晉鼎非男子君看百戰東城死
右戲馬

沛宮置酒君王歸酒酣思慘風雲飛兒童環臺和擊筑
父老滿座同沾衣一歌豐沛白日動再歌淮楚長波湧
龍髯氣拂半空寒虎士心馳四方勇河山蕭瑟長陵荒
野中怒響猶飛揚高臺未傾風未息故鄉之恨那有極

右歌風

桐人氣迫前星黯思子宮成歲華晚高臺有恨碧草新
大野無踪金犢遠一朝弄兵兒罪輕百年鍾愛天倫深
戾園魂魄夜寂寂湖城風雨秋陰陰漢宮樓觀連天起

方士熏香召仙鬼望思望思終不歸茂陵老淚如傾水

右望思

半空高棟翔金雀玉宸總帷塵漠漠西陵老樹暝色寒
建安殘妓春情薄曲終紅袖辭尊前檐傾斷甃飛人間
分香老淚恨不滅秋風吹入苔花斑漢家一片當時土
肯為奸雄載歌舞銷盡曹瞞萬古魂落日漳河咽寒雨

右銅雀

金陵王氣飛祥雲鳳凰臺上聲和鳴鳳來春風花冥冥

鳳去秋風荒草生嬌娥舞散高城暮青山迥隔丹丘路
斜陽門巷語烏衣細雨汀洲飛白鷺江空天濶鳳影遙
謫仙吟罷誰能招六朝宮闕烟蕭蕭月明半夜人吹簫

右鳳凰

宋家天子遊南國紅粉三千臺百尺歌鐘激浪楚日白
簾櫳凝樹相雲碧凌虛高宴金輿來侍臣狎笑朱顏開
臺城宮扉鎖花柳初寧土障生塵埃昏昏醉夢春風幾
不顧江東數千里酒罷歌闌帝業銷青山空映當塗水

右凌虛

賦烏江山廟

鉅鹿一呼坤軸折，咸陽宮殿紅三月。
鴻門壯士斗聲飛，寶帳佳人劍光裂。
芒碭雲氣騰直龍，縞素三宣明至公。
八千子弟風雨散，拔山扛鼎成何功。
天亡戰罪徒云爾，欲問英雄呼不起。
荒祠古木擁蒼烟，夕陽長照烏江水。

促織吟

高秋白露如零雨，促織驚寒近牀語。
美人不寐空閨深，

共向西風訴離苦玉關征人去不歸無書寄與來鴻飛
背壁孤燈照清淚誰家急杵敲寒衣寒衣八月當寄時
今年獨恨衣成遲天吳顛倒舊繡裂春蠶凍損新絲稀
夜長抱膝三太息此懷促織那能知微霜淒淒月欲沒
四壁蕭蕭聲轉急吟成錦字長相思萬里秋空凝愁碧

曉霜曲

空雲黯淡青鱗斜月色慘慘黃鋪沙九天青女曳裾帶
笑拋珠露成飛花僵禽淅颯動庭竹城上啼鳥怨如哭

瑣窗疎簾點輕毳古砌芳花凝碎玉繡帳垂深闌處
兩兩金烏噴晴霧春濃入骨不知寒屏外淒風倒回去
燭龍破夢驚晴光酒波暖艷酥花香笑看碧瓦凍鴛鴦
豈知茆屋悲無裳

班姬吟扇圖

昭陽歌吹圍春濃秋風蕭蕭長信宮冰紈相對慘愁色
馬知與爾同秋風空庭無人綠苔滿搦管凝顰寸心遠
孤吟聲入蒼空長行雲日暮含清婉妾淚斑斑扇上詞

妾恨綿綿扇上絲輕塵瑣篋素月暗初寒掠幔清霜飛
一時淒涼千載惜宛轉餘妍寄丹碧人間恩怨非闕心
三詠綠衣空嘆息

雪夜

樓高夜深風撼扉酒醒雪落寒生衣空山萬水凍雲合
隱隱蒼兕鳴聲悲西隣吹笙宴豪家畫燭搖空光爍爍
陽春入髓朱顏酡玉壺催箭東方白閉門凍臥一長歌
任渠盈尺無人過袁安高節世亦有洛陽令尹今無多

送陳端叔游盤山并寄友人

一尊三人同吟嘯風雨夕清歡宛在目別思已盈臆天
風北雁吹來書書中問我今何如別時有詩寄君去書
來何事新詩無君家有樓名望遠舊約幽人游歲晚猿
啼鶴舞迎長裾雲影泉光浮疊巘山中酒熟梅花開何
妨滿引傾千杯高歌響撼金華洞白石鬱鬱行蒼苔山
南山北多詩才想見颯沓飛車來百年盤峯此客少諸
君意氣須顛倒

殺虎行

蘭溪太守令劉昆癡虎有耳胡不聞夜深安尾古道上
日莫搏犬荒城根風吹黃茆走白額獵夫一見懽踴躍
亂刃交揮白雪翻雙眸怒迸金丸落後車縛送如獻俘
當軒裂肉空須臾長河無蛟惡黨靜里中三害今何如
平生意氣多豪野亦欲短衣馳足馬一掃腥魂險穴空
長歌慷慨南山下

留別求愛廬

括蒼名山列仙窟一洞寒雲白日黃精已辨空山糧
青鞋欲躡幽人迹荒城九月風雨多兀坐空齋聽蕭瑟
溪南木落草色黃千峯蒼蒼老秋色明朝且訪淵明廬
琴書四壁一事無菊花滿籬酒滿壺幅巾短筇成畫圖
插花傾酒歡何如氣酣目送飛鴻孤長歌西望歸來乎
次韻冬夜吟

荒城虎號風色變雲翳天星沈不見起呼斗酒拔劍舞
照空神光耀流電洪濤鼎顛翻東溟空山石裂山鬼驚

酒闌匣劍長太息怒氣冲冠髣髴髮森風埃茫茫暗六合
日月炯炯懸丹心少年意氣浪自喜讀書無功不如已
傭奴坐享鍾鼎貴公等政湛溝壑死更長凍雪三尺深
抱膝長歌茅屋底夜光橫道驚暗目陽春抗音掩俗耳
蒼天千尋兮地萬里嗚呼知己之士真難企

子昂模韓幹牧馬圖

開元內廐多名馬畫手無雙數曹霸弟子韓幹筆意新
承恩亦向天墀畫含毫拂練五雲動旋闕轉軸羣龍化

圉人臨閑振金索御鞍初卸收黃帕豐草聯槽晝不嘶
飛花卷仗春停駕西風回首征塵生蜀棧青驄愁獨跨
趙公何從得此本步武曾韓相上下驪黃掃空四海眼
丹青妙續千年話誰云此馬不復存看取匣中光照夜
落花行

東風吹花花作團美人脈脈凭闌干倦投紅筵逐舞鳳
故尋翠袖縈釵鸞去年送別城南道城南飛花映芳草
關河萬里人未歸風雨一番春又老抱愁無語還空閨

拂釵攬袖香依依綠陰鎖窗蝶影斷空枝弔月鵲聲悲
青春不復回游子不顧期美人掩淚長相思恨身不似
花能飛花飛終恨沾塵泥安能與花飛去陽關西

寄李坦之

幽人一出九鎖山朝吳暮越無時閒烟霞縹緲隔清夢
風埃慘淡傷朱顏今年閉門穀江許者藥高堂奉慈母
春深花落愁不知高樹新篁響風雨天涯獨鶴少儔侶
我時過君得晤語江空日暮孤雲飛西望青山渺懷古

山中之人不復回松聲澗水含清哀洛陽年少今亦老
漢廷卿相誰憐才人生未遇休慘戚浮榮無根易超忽
千年間氣文章在半夜高吟鬼神泣相逢三月一字無
近來清思知如何

苦旱行三首

五月苦旱今未休青空烈火燔新秋雨師不仁龍失職
百鬼廟食茫無謀我欲箋天訴時事只恐天公亦昏睡
蒼生性命吁可哀風雲何日從天來

又

皇天不雨一百日千丈空潭斷餘濕連山出火槁葉黃
大野揚塵烈風赤田家父子相對泣枯禾一莖血一滴
中夜起坐增百憂雲漢蒼蒼星歷歷

又

吳鄉白波田作湖越鄉赤日溪潭枯衾裯不換一斗米
細民食貧衾已無連艘積廩射厚利嗚呼此曹天不誅
聞道閩中米價賤南望梗塞悲長途

落葉行

山窗獨眠抱秋冷四壁無聲中夜醒天清急雨忽萬點
月出枯池紛衆影開門颯颯非故林滿空亂葉搏愁陰
石澗流紅細泉咽蘚痕掩碧孤蟬吟高秋共誰聽蕭瑟
却憶江南遠遊客楚天搖落白日高萬里扁舟蕩秋色
江南客未歸山中葉亦稀相思遶遍寒樹下有恨願隨
秋風吹山空夜寒風漸微珍珍霜露沾人衣哀鴻獨叫
殘雲飛

春雨晚潮圖

昔年曾看錢塘潮，龍山山下乘春濤。
中流回首洲渚變，孤塔不動青厓高。
雲昏水暗雨陣黑，雪噴電轉潮頭白。
浙江亭遠亂帆飛，西興渡暝千花濕。
空江茫茫魂欲斷，歸來十年今復見。
浩蕩東風滿畫圖，淋漓海氣飛人面。
春深故園芳草生，鷗夷遺恨何時平。
重游弔古惜未得，掩卷歌罷空含情。

殺虎行

濱州胡氏至元間隨夫劉平攜二子戍棗陽暮宿沙河虎至曳平去胡氏掣虎足呼七歲子取車上刀遂殺虎扶平奔李陽堡三日而死李陽趙侯上其事為復其役而旌其閭云

劉平夜宿沙河濱猛虎怒曳車中身妻奔掣足兒取刀殺虎扶歸李陽城虎雖已就死平亦不復生婦人義勇驚四海朝家旌節垂千春嗚呼征戍當軍興鋒矢錯落尸縱橫是時不獨虎口死幾人痛惜金釵分太平何鄉

非樂土骨月燈前夜相語願君寫取麒麟與鳳凰傷哉
此圖當卷去

寄黃晉卿

繡湖有客今奇才豫章千丈翻風雷讀書羞坐廣文館
騎馬欲上黃金臺石頭城邊訪遺跡長吟不換公卿檄
故山藂桂喚君歸十年被褐無人識我游東城誦佳句
風雨深春綠陰暮孤舟落日竟空回去燕來鴻不相遇
文章落落俗子嗔賈生謫去揚雄貧一時暫作失意士

千載同是非常人相逢車蓋不用傾與君異縣情已親
卜隣未遂三宿去日夜悵望東南雲

追和坡翁松風亭梅花三首

老坡醉墮南蠻村賦詩喚醒冰姬魂松風亭高寒瑟瑟
羅浮山暝烟昏昏朝雲已空嶺外夢陽春自到江南園
主人孤標迥不俗當時盛事今再溫高歌起踏中夜月
不眠坐見空山暝炎荒萬里浪奇絕玉堂回首深君門
綠衣飛去梅樹老千載白鶴應能言村居願子且勿出

相看痛倒花前尊

又

平生江南烟水村梅花欲開先惱魂
翠毡醉臥花下雪銀燭爛炤林間昏
頻年旱飢酒禁重病肺抱渴如文園
夜寒霜墮月滿屋松風一曲山鉶溫
嚼花自嚙清澗液吸景不待朝霞暎
舊游俯仰未成夢歲晏蕭條空閉門
故人萬里不得見新詩一咲誰堪言
水香花落春漲起安得快意浮吾尊

又

佳人獨立空山村
天公與香來返魂
朔風倚竹翠袖薄
凍雪掃地玄雲昏
我居山中臥愁寂
十年不醉西湖園
水荒月墮破殘夢
燈青火白淒餘溫
明朝爛漫三尺雪
亭亭玉樹迎初暎
冷光焰映虛白室
清氣散溢無窮門
此時妙趣誰共領
對花宴坐終忘言
微吟覓句漫自苦
况肯檀板傾金尊

後苦旱行

青空晶晶月色白竟夕飄風簸城陌禾龍揚塵未足驚
千頃滄江亦龜坼前年一旱困未蘇四年三見古所無
荒村十室減八九斯人化作溝中枯田廬盡入蕪并室
妻子存者今為奴空名賑飢不得實並緣官粟私門儲
民田無限紛自恣貧弱祇賴天公扶吁嗟旱禍獨爾及
天道冥漠知何如

答黃晉卿約遊金華三洞不果

子從金華遊寄我金華篇金華相望半百里嗟我欲往

心茫然涼秋九月天早發夫容前峰回路轉僧舍盡澗
水不斷松聲環玉女孤墳落葉裡杳杳白鹿鳴空山山
空洞窟研半吐青芝如花溜如乳高巖覆屋踰結構亂
石迎人欲飛舞其餘二洞更迥絕異象殊形閤出闕空
窗忽透中夜日飛簾長挂青天雨仙家樓觀何崢嶸赤
松霞氣丹光橫初平子安期生相逢一笑應相迎我生
胡為墮世網回首白雲空爾情

燕子行

清江朱樓相對開去年燕子雙歸來東風吹高社雨歇
一日倏忽飛千回翻身初向烟中沒掠地復穿花底出
花飛烟散江冥冥城郭參差滿斜日無情遊子去不還
短書寄汝秋風前繡簾不卷春色斷空梁泥墮琵琶絃
飛檣冉冉瀟湘浦春盡天涯路修阻一夜相思柳色深
獨上樓頭泣如雨

寄黃晉卿

故人別我今何適書來尚作吳興客天目雲愁百里陰

太湖浪激三州白孤城渺莽雲浪底高秋悵望川途隔
周南太史終歲滯洛陽年少何人惜似聞幕府招延君
法律應須早致身腐儒白首遭笑罵遊戲聊復驚庸人
客中得士佳有餘新詩滿幅來起予人生可樂在知己
素心不為食有魚青楓葉赤照野水飛帆翠蓋何時倚
念我孤吟空斷腸閉門寂寞秋風裏

次韻苦寒行

江雲凍黃青日墮苦寒欲禦誰能那蛟髯冰脫僵起立

鷓鴣風高退飛過陽春却在五侯家繡被不愁妨睡課
捧觴艷眼送一曲閉閣下簾重百和君莫笑窮詩翁蕭
蕭破屋簾瓢空隨陽恥學南征鴻漢時袁安臥雪中至
今千載垂清風

梅枝歌

槎牙千歲枯梅枝鐵骨孤瘦苔為衣不留花葉混凡木
默謝規削含天機嚴陵主人欣得之朝扶暮倚長相隨
清餘冬樹雪月艷潤結夏林烟雨姿千峯萬壑同來路

飄然今復遊何處已將形影共歲寒肯向風塵爭捷步
羅浮花開春正繁安得攜爾同躋攀手招仙人喚綠鳳
側身飛去青雲間

和李坦之九鎖山聞簫

青山九鎖多飛樓仙人吹簫樓上頭洞中鳳舞花纂纂
潭上龍聽雲悠悠曲成三弄猶未已夜深月出闌猶倚
汎聲流響滿千岩長松怒肅悲風起一從之子離故山
夢憶娟娟空濛間錢唐道士紫玉管時復聽之開心顏

斯人忽去無消息回首山中亦荆棘憐君獨客向江城
青楓墮影天霜白知音之士不可忘感時撫事成永傷
莫怪當年向常侍愁來聞笛賦山陽

墨竹行贈元生

洋州太守天下無墨竹一幅千金俱當今李公得其法
聲價絕代傾鴻都元郎睂宇清如水早年放蕩仍相似
靜臨真態燈月下獨玩天機風雨裏渭川千畝春林深
瀟湘一片秋雲陰引竿鼓棹咫尺近弔古渺渺愁人心

東城重來春欲暮寫遍人家屏與素墨痕醉袖兩淋漓
蹀躞馬蹄花滿路古來奇士非畫師能事不受塵埃羈
胸盤成竹手不知根源一一葉與枝我生愛竹忘朝飢
歸來城南結茅茨當窗萬箇志已足安得與子同幽期
風帆落日翠袖遠高歌把卷長相思

桐廬夜泊

合江庭前秋水清歸人罷市無餘聲燈光隱見隔林薄
濕雲閃露青熒熒樓臺漸稀聲漸遠何處吹簫猶未斷

卷四
淒風涼葉下高桐半夜仙人來絕巘江霏山氣生白烟
忽如飛雨洒我船倚篷獨立久未眠靜看水月搖清圓

山樓秋望圖

荒崖蒼蒼映高樹樹缺飛樓秋色露樓中有客獨凭時
溪上何人却歸去風埃低垂傷我顏嗟爾乃得專其間
晴窗掩卷意未已一夜夢繞江南山

飛來峯

何年靈鷲西飛來平地湧出青瑤堆老根盤絡樹奇古

不著寸土天所栽上有長藤走寒廕下有積葉粘枯苔
懸厓孤撐危屋覆嵌竇上出空窗開山根幽泉行未遠
細響激激隨灣洄流風忽起林影亂秋日欲落猿聲哀
我來臨流一濯足試歷竅穴窮崔嵬胡然列像森怪惡
高下斲鑿紛岩隈當年眩人嶂吳越怒勢方張誰敢摧
彤墀朝夷峙聖塔璽紙莫出颺寒灰可憐卷石亦當厄
舊觀一失何由回人間好山政無數爾曹錯據彌九垓
人區冥冥幻鬼窟更多金碧傾瓊瑰惟應震蕩再開闢

始得一洗無纖埃平生山水興不淺亦擬勝處聊徘徊
空亭坐對增嘆息出山始覺心悠哉

牆西梅花

牆西古梅側欹倒一半花開出官道道傍過者爭注目
弄蕊扳枝矜媚好幽姿詎肯隨俗態高艷何如委凡草
心非真契漫相逢計失深藏難自保何如空山荒澗底
千年古徑無人到寒香不道暖蝶知落英惟有春風掃
會當移植遂爾性不用哀吟對枯槁

梵隆畫番王獻佛圖

如來宴息雙跏趺碧海涌座紅蓮敷身如浮雲與枯株
一毫無有寧願餘不知何國被服殊緩耳卷髮黃虬須
狻猊巨象先後驅寶盤五色摩尼珠歸誠贊貢陳區區
拱手偃立顏和愉足明神化羣情趨眇然韋布一懦夫
乃獨抗論非空無見之不肯修勤渠羣嘲衆嗤謂爾愚
作詩三嘆還君圖

題趙守雲壁振衣二亭二首

胭脂山北厓光青中含層白雲英英玉烟乍出翠屏裂
碧海忽湧銀濤生主人一見淡怡悅收攬奇觀歸千楹
仰看垂天作飛雨俯視疊影浮晴泓卷舒萬變真體在
動靜不測神機行悠然妙處當自領豈但卜築誇經營
武昌亭臺一十萬誰家絃管無新聲青衫不受塵土沈
玄賞獨有山林情座間翰林老詞伯健筆一落空崢嶸
舊遊倏仰二十載却驅五馬東州城卷中攜此千仞壁
使我想見猶神驚

右雲壁

人間埃壒紛茫茫染衣能溜眯目黃誰知潔土本無汚
有如濁水涵月光武昌參軍庶務劇喧囂牒訴環咨榜
九衢障面蹋斜日瘦馬湍汗如流漿城隅咫尺有丘壑
白雲翠壁搖滄浪危亭直上宇宙濶振衣長嘯天風涼
俯視擾擾衆蚊聚仰見矯矯孤鴻翔神怡體曠心目適
便欲超忽凌八荒屈平獨清當時笑騷語千載遺芬芳
羨君拔俗古來少况復餘事攻文章飛霞之佩高頡頏

餘子減沒誰能望

右振衣

和申屠子達春暮田家即事

長河無際浮空冥一瀉可溉千村青禾苗蔽日不見土
下有清水鳴泠泠白魚肥美新酒熟飲食俾爾闕丁

叫囂無聲

闕

鼓息中夜甘寢何曾醒我來值此良自慶

公餘但欲深閤局歸耕未成強徇祿飯蔬不恨無羶腥

脩河道中

雲穿漲空如刷煤疾風怒雨相隨來我舟中流四無際
高浪掀舞聲喧呖冥冥不復辨咫尺觸樹乃始知灣隈
破蓬淋漓濕被面想應為我前塵埃暮投村店雨未已
土牀漏屋生莓苔跳蛙鳴蚓入我屋四壁聚蚊成殷雷
中宵不眠坐達曙嗟豈有意茲徘徊符移聯絡星火急
潦水洞決隄防開河渠使者峻督責奈何天意方為災
負薪築土非所憚強顏俛仰胡為哉

孫孝子

保郡新城孫孝子起家掾曹宰百里母病去官如脫屣
躬嘗湯劑悲不起結亭瑩兆廬且止朝吟暮咽淚穿眚
誓言終日守松梓孀孤姪寡嫂姊割產廩之寧薄已
嗟公之行與無比飛書上聞揚厥美華表煌煌著千祀
禮墮世季澆風靡披哀肉食怡弗耻傾貲異教諸非鬼
棄喪忘哀亟從仕我深嫉之人所詆誦公此事尤卓偉
秉彝與天亙終始皇化清明敦孝理公今作宦在風紀
願令汚俗歸一洗四海法之循聖矩

追和吳玄夫寄韻

去年風雨人過門，只尺軟語勤相溫。感君此意深到骨，

淚落闕放不得吞。驚心昔別又五載，日月歟忽如跳奔。

一官浪走千里外，長淮巨澤波渾渾。拏舟循闕逐雁鷺，

負土卷闕驅蛟龍。老親同來竟舍去，我足雖繫思騰騫。

安知一朝奇禍作，悔不早計回南轅。少年逢銳類戰士，

挾執鞭弭仍橐鞬。祇今憂患黯消落，但欲燕坐忘朝昏。

京華遊泛君最厚，篋中手錄今猶存。雪窗重炕每共宿，

泥塗軌轡交相援青春忽作慷慨別拂衣便指山之樊

九

闕

斜日重回首御溝新柳垂周垣霜蹄暫蹶未為失

天路再騁誰能藩索居無人思轉劇鬱鬱莫吐胸中言
仙華絕頂有奇觀下睨海日扶桑暎披雲試即玉女迹
把酒遙酬粵客魂著書築室約歲晚與君霞帔同高掀
丈夫窮達安足論要以不朽垂乾坤

粵客謂謝皋父

雲中簡吳子彥

北風吹衣馬凌兢岡頭往來降復登敬亭相看最不厭

今朝蔽障玄雲層歸來靜聽打窗雪松爐細撥寒灰騰
故園梅花入我夢誰遣鐘鼓催晨興吾宗潭潭萬間屋
隙宇容容逃嚴凝去年之客豪馮凌美人狎坐酒如澠
今年之客貧如僧茗椀闕雪蘼盃冰人生彼此各自適
問君誰愛當誰憎只愁歲晏舍我別闕

禮部集卷四